

劉

禮

部

集

劉禮部集卷十一

樂府古詩共六十首律詩絕句三十三首詞七首

短長吟二章

長太息兮有所思  
心懷君兮君未知  
山隱麟兮不開泉  
涸絕兮成谿  
日方中而見沫星  
雨霽而夜迷  
雲溶溶兮撫帝閭  
發長嘯兮天應聞

祁連高高接天南海遙  
難問津我所思兮西方美人道  
遠莫致兮泣下霑巾  
我所思兮東方大人  
山河阻修兮云誰與  
陳羲和日趨遠  
百年苦易滿  
庭樹一葉凋  
腸中九輪轉

情詩三章

以下五言古詩

回飈靡芳樹  
日月相流照  
光輝忽以晦  
下上憂心悄  
芳

樹棲鳳鸞百鳥來如煙和鳴忽相失獨鵲何翩翩思君  
若上天好風孰與通願君假毛羽暫得親鴻濛空谷生  
幽蘭深澗有喬松誰與理絲繳魴鱣橫大江

昨夢忽明發言之大海東君心自明鏡安用雙盤龍君  
心良比玉安用琢夫容夫容生連理盤龍懸綺牕微風  
繚繞之盈盈月當櫳君心一朝左月就雲中墮連理亂  
如絲言尋寶劒治折釵破明鏡鏡破無合期雨止漢案  
戶天潢下垂垂

海日上璇閣丹霞結金局隱隱何疏越中有瑤琴聲沈  
爐綠煙滅翠幌暈光生借問安所思要眇殊復情初彈  
鶴未降再彈鸞未鳴洪波忽如岳行雲爲之停搏桑真

人來芳樹揚孔旌六龍駕飛梁萬象紛杳冥邂逅一相  
遇眾嬋俱屏營

述感八章

潛淵采明珠淵深憚蛟螭陟山采虹玉山峻防熊羆仙  
人憐爾誠錫爾麟辟邪龍堂綽竒麗銀闕紛縈紆五色  
盲人目流連古所愚揮手謝松子且還讀我書

金塘植芙蕖其容皎且妍似感朝陽色欲奪丹霞鮮陽  
光非不溥偏與弱草先傾心蒼長照應獨知可憐

暮春花隨風深秋蘭隨霜美人貴本性采之登玉堂當  
其未攀折衆目過若忘郁郁紛遠烝謂同百草芳竒芬  
誰與玩向空揚其香

飛甍百餘尺當戶秋河瀉平眺臨九衢闐闐喧車馬越  
鳥遲北征塞雁空南下會取憑高意蒼梧雲在野

齊桓存三亡不存自爲恥魚軒與文錦獨衛得殊禮楚  
宮鬱嵒峩景山夕陽紫雖云帛冠儉戎曹乃齊士造邦  
是何德視之于木桃報齊以何功結心以瓊瑤

我聞于闐羌飛玉走靈鵲輦之魏闕下其價等金錯明  
珠在鮫館棄擲亦沙礫翠幃皎夜光始知帝王樂物遠  
覆見珍情疏豈終薄景暉隔雲際茫然託遐矚

飛龍欲升天噓氣藏其身威豹欲出山驅霧隱其文眾  
人貴目驗君子能博聞一朝雷雨作方識龍豹神達人  
睹微眇天授自有真如何眇見子但解輕泥蟠

飛鴻善察色不受樊籠馴乘軒祀鐘鼓棄之猶浮雲況  
乃噉蹴食羞與鷄鶩羣當世重施報芻牧爲釜鬻稻粱  
雖有謀不如還故林

車中卽事四章

仲秋霜已零寒風警幽抱平埜浩漫漫殘月白煙艸蕭  
蕭古楊樹離披萬冢頭諒哉可憐蟲時與此輩儔憂來  
惟假寐馬上夢封侯

密雲散雨絲夢斷忽姓晝借問翻覆情何如一揮手子  
午具裘葛卯酉裝薄棉一辰象一月一日象一年催老  
詎不足何須更憂煎未知稅駕時以酒陶其天

羹飯雜塵土飢者弗能食莞簟處蟣蝨勞者弗能息車

輪何碎旬駐馬待昏黑遠遊非所好九州半足歷艱難  
餐風霜強忍越險仄身是薦相孫被褐良不惜老母念  
孤露負米情惻惻安得竒肱轡歷想從所適

幽林暗如漆陰森象威神顛顚化竒鬼乘險來迫人瘴  
霧蔽前路不辨樹與津孤燈黯無焰伏莽時一震僕夫  
色然喜晨鷄喚朝暾

雜詩三章

延陵辨鐘意荷蕢知磬心聖愚各藏跡達士通微恍果  
懷龍雷質自愛淵泉深皦皦不能舍時爲作甘霖通塞  
任所命戶庭思陸沈坐看桃李華抵節鸞鳳吟山川本  
莫定神禹亦不矜匡居有茂對至樂還自尋

揚靈夢登天中道覓無杭陟降自有時離合失其方宿  
莽寒未枯卷蕤心已傷瑤臺何偃蹇受詒集鳳皇神女  
光徘徊保美日以康幸有靈瑣留誰爲申惠纒續紛歲  
華宴鬻草寧徒芳

牛哀病成虎啟戶戕其兄鼈合鼈已游邾主讓其王聖  
人達情狀變化慎所藏周犂引聯榻車子中夜啼司命  
執利權敦薄任所施盜形豈金石汲汲千載期流泉不  
暫停徒爲後人嗤

谷風

積飈振林木陰雨悲予棄躬耕不求聞素位得吾志胡  
爲感行邁艱險願歷試凌晨謁天帝關梁集羣鬼時聞



猛犬聲重門但深閉跼踖躑躑鉞璫眾中敢出氣須與電  
光開振衣躡雲陞額叩陳寒暄讓坐復還避慷慨抒中  
情安聽定如醉色授更覓與強言徇人意仙者本無求  
宛轉觀變態碩鼠多畏人毛蝟或縮刺傾耳旁擊雷凝  
目側生荔窈冥中有精瞋眩入三昧惜哉巧歷術施之  
轉機世弱冠通春秋深刺在盈諱葆真還讀書狂言自  
爲戒

明月篇

高樓映空綠玉女時窺牕明明三五月皎皎臨寒江圓  
滿及此時顧影憐無雙攬輝滅華燭揚彩盈珠櫳起舞  
縞素衣姮娥失其容潯陽正求偶造舟焉可通儀態照

四海斂顏處元宮神霄

孟康漢書注霄化也

冀復形太息明光中

積雪吟

掃地愛赤立奢泰莫肯遺幽王滅宗周胡亥亾西陲保  
家尙培克顧笑忠厚基積雪見睨消繁華逐風披當其  
滿谿谷萬代同一時爲語彼其子慎勿學榮夷

阻風彭蠡五章

洪波駕山來泰颶無時休飛雹如激矢簸盪奔陵叩連  
檣不能進乘蹻凌陽侯揚靈招正則爲我歸來不冰夷  
斷雲根天吳鎮安流思歸見鄉國惻愴令心愁

飛花逐流波一去無定方如何遠游子山海迷故鄉悲  
風號垌野白日忽寢光積陰昧昏晝浮天水湯湯方舟

如孤蓬失根隨風翔昨日思飲水何意申繁霜重裘薄  
于縞風刀透新鉅徒衾避宵雨明發心徬徨風波久失  
期高堂夢飄揚途窮分應爾念此摧中腸

舵樓望番湖鴛鵲難爲梁馬銜當我蹊黑蜨迷我行甲  
子已昏墊故鄉在何方頭蓬不得梳衣垢無可更負米  
百不遂資斧嗟空囊計程尙兼旬七日無見糧荒村更  
何有腥腐雜酪漿曲突飛濕煙然桂炊瓊英愧非蓼蟲  
性辛苦亦備膏芻狗積罪深含悲訴穹蒼

昧爽發彭蠡齋蔚濟朝雲遙知香爐峯紫煙紛綢緼愧  
無伯昏足二分行巡遼丹赭凌赤岸素練開松門金膏  
與水碧仙靈閼其英栖岩計靡就東風散餘暝

泊舟芳草岸落日生莫愁彼姝者誰子拾翠來春洲  
波惜紅裝避人隱青楸時俗迂獨立報君送遐眸俯仰  
愛桑榆非爲輕行游馳暉不我顧眴然返高樓鄰舟動  
歌謳絃管哀中流形影忽不見悵望孤雲浮

魯郡有感二章

浮雲蹙魚鱗倏忽成山却嗟我清迴心驚飛若波濤夷  
險同所享進退無外求世網可虛與忘機海中鷗察淵  
道者忌逆億性日偷出戶辨通塞知幾審剛柔厲此介  
石懷樂天復何憂

朝尋靈光殿巋然今安存彤彩豈不華設教焉足觀元  
公總六執宣聖申天言弱齡開管鑰溫城得宗門秘義

炳日月思欲傳其所喻唯利達要道恐不尊經腴鮮  
知味隳括垂空文

孤竹

泰山何崔嵬下有孤竹林貞筠抱霜雪勁節凌高岑伶  
倫審音律裁作鸞鳳吟嗤彼斷續手飛土驚幽禽奇材  
固難用亮直世罕尋腰鎌刈蘭草焦爨埋桐琴我從山  
畔來言是嶰谷音聲和效于古竅厚徵自今軒皇盛竒  
舞消息和陽陰披榛到幽徑無使蒿萊侵名材不徒出  
匠石寧久沈龍化會有時魚須亦獻琛天寒正玉汝日  
暮生苦心濃笑桃李花當春舞迴風馳暉忽云邁淪落  
空江潯

饑鳥

南山有饑鳥所志非稻粱  
餐飲風露姿吞吐日月光  
朝乘五雲飛暮宿百鳥翔  
眾訝毛羽異無乃爲機祥  
彎弓欲射之徘徊以旁皇  
竹實滿上林桐樹生朝陽  
靈棲不擇地駭俗招愆殃  
雲英動六合奇舞照萬方  
送女返阿閣鳴聲中歸昌

題有秋圖

我聞文景初紅腐太倉粟  
賈董陳積貯春秋重二穀  
家令言兵事翻云賤金玉  
武皇遂荒淫轍跡遍馳逐  
兵連數十年流血滿川谷  
宣房塞輒洩薪芻燒不屬  
漕輓給中都三歲苦乏蓄  
縣官復大空民生更日蹙  
持籌御史

桑報績齊相卜賈人悉乘傳州閭耀丹轂雜道郎選衰  
株送刑益瀆良田沒汙萊原野轉蕭索輪臺忽下詔黍  
律回春煥丞相封富民遺黎命方續中興振前業風俗  
仍返樸我皇初御宇秦楚占戎伏偏災天示警河患廢  
荒度發帑千萬緡輸粟億萬斛近聞太平詔歡呼滿白  
屋重農親藉田京儲溢種稔吾儕幸無事擊壤歌鼓腹  
朱公金閨彥力穡通誦讀周基農以開尹志耕則樂  
獲艱難得殷盤訓高族作圖示子孫莫言不耕熟會看  
施政事實刀買黃犢致君邁殷周文景焉足錄

于役東陽作

舟行訪折腰謫訴紛控愆浙右延妙譽大僚諒嗟竦持

籌免交謫執朴奮餘勇立幟稱相門用法真將種鳴廉  
守坤吝保位存震恐我來清風館言尋白雲洞卑枝掃  
行迹幽局距迷踵故園已春深違此袂筵蓀

宿桐陵鎮

五更鼓角鳴羈人屢宵警梟竿矗江介落日動愁影去  
歲禾不登暮宿無孤艇荒政示德寬重典繼刑猛客行  
既少戒飛鴻集鄉井今春積陰雨麥隴鮮粟穎乞食相  
扶持哀籲我心忼朝廷重偏災善賑居最等蝗吟與河  
嘆民命時上請承流多召杜水旱必躬省勞民易興治  
改紀望賢尹

泊舟鳩茲吉祥寺



危檣列重圍星火蒸元顏浮圖聳候樓風雲結嚴關聖  
代無暴客殊恩收情頑此等輒假威析豪計深腹文算  
已登冊飯食亦早完繫令耗日費不給清放單苛商益  
病民惟博奴顏懼遂令善良法翻爲行旅患堯民本馴  
擾束縛如惡奸奸宄或橫行掉臂脫纏牽弊吏必尙廉  
要言重周官

島沙港阻風

我愛山色佳乘興偶留此新得良友書忘家更生喜長  
風破輕浪去帆疾于駛舟人似驕我踞坐或枕臂天公  
本無心去住等閒爾明朝竿鳥轉汝宿何山址淹速有  
前定歸期安可指

至池州

橫行疾趁風終日無百里驚湍安可逢順流尙如此三  
春棄我去行役曷云已齊麥十里青積陽半山紫含采  
難葆珍辭親強徼利馳歸理章甫歐駱空飛轡

贈裘春洲兄弟三章

日出樽桑巔傾枝集鸞鳳遺響振虛谷回翔天門弭翮  
羽來如煙當陽闕清咲高舉凌八荒蜚光及鴻網託聲  
龍門峯頰視千仞洞容儀未泮習矜若雙南重軒帝方  
裁筒誰攜玉堂貢

我乘江雲來邂逅承良宴齊心未及吐促顧救中膳饗  
觴酌玉醴翠椀盈星飯縱論輕百城揮毫溢千絹仰觀

參井橫坐惜春華  
晚子行送歸鴻  
我返逢社燕  
山川通情悱奈此渺河漢

昭昭素明月流輝入牕戶  
象簾捲空牀  
晨飈動高樹  
嘉會殊未知  
臨歧各馳慕  
思歸願帆疾  
念子不忍去  
離樽結綢繆  
清商割衷素  
相期最舊德  
別促長遭遇

主客圖

樓臺幻虛景  
構想殊荒淫  
及此歲月閒  
集賢開素襟  
松竹清暑氣  
桑榆延暮陰  
明霞浸虛度  
薰風生古琴  
願言申所好  
弗闕金玉音  
我職理兵農  
果稅風所欽  
諸君曾暫徒  
羲軒託微吟  
吐子冰雪文  
消我塵俗心

右主客贈客

疏林逗微雨  
曲沼凝清香  
良友數十人  
空洞容君腸  
廣

夏可萬閒負郭無一倉廉介非季次豪俠非孟嘗人我  
相元幻爾女形胥忘賓至不思歸吳會豈異鄉游魚縱

巨壑鳴鳧翔高岡稱子千斯壽酌我萬斯觴

右客  
酬主

樽桑耀朝旭結此連理枝落岑同臭味荆樹生華姿何  
以比直節修竹堪爲師何以比貞潔青蓮擢華池何以  
比風徽楊柳搖碧絲何以盟歲寒松栢千載期何以結  
同心芳蘭九畹滋何以卜後賢新桐挺孫枝種榆自天  
上雨露凝瑤池種杏依日邊雲霞煥丹曦樂莫斯會樂  
舊雨新相知

右台  
樂

溧陽令陳曼生出其祖鴻博公士璠集諸同年爲湯餅  
會詩冊見示敬次先文定公元韻

昔年同奏賦顧我頗自笑黃門見二毛陽編猶竊盜訂  
交連理館述德各驚噪手出先澤編筆削互參校煙雲  
七十載悲感又相勞長筵過三爵秋花園四照先生霖  
雨才籌國意深到陸沈理僻左何時宰廟廟畫理參龍  
眠琴心辨猱蹕繩武同所期學步安足誚燾後唯著書  
曼世願申禱且食萊蕪魚休減伯鸞

附先文定公元詩

此詩集中不載題云奉賀  
魯翁年老先生舉丈夫子

十年寓京師生事劇堪笑逡巡抱四女人言可卻盜  
今年舉一男檐鵲亦驚噪雄飛與雌伏達者安足校  
先生商瞿歲添丁客爭勞冬釀被香辣春燈回燠照  
太邱擅世譽令器皆遠到睠此玉雪姿蓄眼貢天廟

作駒已汗血凡兒空蹉跎明珠要老蚌焉用騰訶誚  
如卿洵有功而我特善禱我輩爲人父努力且增竈  
屠琴塲說詩圖

古詩無達詁六義貴達政齊魯韓與毛奧誼各徵聖漢  
季微言絕箋疏爭王鄭孰采秦晉音絃管播清聽春秋  
繼王迹雅樂孔所正兩經久無傳古意誰與定我朝  
聲音學妙契三代盛作者森如林覆瓿我心恧屠侯文  
中豪吟諷出天性哀矜省訟篇經緯種桑咏思昔武城  
宰弱冠操道柄精研在文學燕射習絃磬風儀千載新  
勿以小邑病

小檀藥室讀書圖

雪窖挺瓊樹火宅生青蓮濡燕非真人溜磷豈白堅卓  
犖屠使君結廬清平山婆娑撫古樸左右圍檀藥良友  
四五人圖書千萬篇頽仰究今古用舍憑昊天如何僻  
左區置我瀛洲僊經文集羣彥奮武戢暴姦遂使稂莠  
民各安桑麻田晨風播弦誦夜雨開木棉晝哦長松下  
宵夢柯亭邊贈我介石操乘我大願船落岑合臭味生  
理明憂患相期豈旦夕緬彼洪厓扇

歲暮懷人雜詩十六章

高樓亘雲漢初月臨綺牕彷彿雲中君調弦落寒江蓮  
花然錦帳明珠縣玉釭忽乘白鳳飛芳意王母通王母  
厭芳意小謫塵寰中仙骨終不移溜水欲澌容何時反

瑤臺將爲御兩龍

束髮弄柔翰結交多素心  
蘭言愜幽契芳思通瑤琴  
忽疑從何來言自玉宇中  
別如商與參會若雲與風  
誰謂河漢廣牛女長頗光  
誰云岱華聳日月還相望  
所思杳冥冥魂夢時飛揚

皓月照霽雪朗如行玉山  
恍遇同袍友風霜洗容顏  
憶昔童冠時會吟涉簡園  
園中羅珍木池上栖宛央  
玉樹初作花光暉溢中唐  
叢桂生周阿綠篠夾回廊  
清歌引商羽和以風花香  
坐我青玉案飲我瓊瑤漿  
饑驅竟何之此意竟欲忘  
奔駒怛逝川神仙愕景光

阮咸痛孤露報劉志未伸  
爲人和以介直諒能博聞  
久



作闕隴行冠蓋紛逢迎  
蒐奇富金石裘馬自生光  
婚嫁願既從歸興殊難償  
一卷水雲文嵩華如壘  
丘周孔通夢寐賈董羅門牆  
所重行誼敦梓里相扶將  
惠我尺素書馳以兩驕驄

仙人號若士聳聲出雲表  
抗論邁三古秦漢一何小  
摛華耀朝日妙理蘊夕宿  
益益春在蘭亭亭月當柳  
一朝棄妻子東海擬高蹈  
相攜童男女遠訪徐福島  
故人倘見思回舟須及蚤

筱山古畸士與世殊柄鑒鑒物德操智孤忠鄴侯激微言  
發深省神遠心自矜疾惡若鳩羽甘善飲醇醪恬淡貞  
素誠不器適大道獨抱堯許情悠然對蒼昊

嶺梅發春華澗松動寒響當今著作才曄也乃絕唱源  
源薄騷雅短咏彌清暢窮愁醒欲狂豪素昇炎丙安得  
梁王園枚馬同俯仰

清時重經術孔思本天授茗柯絕世材假年志不就金  
淵與玉海孰啓後賢覆申耆亦博綜一麾用差謬若得  
曠世遇禮樂庶可復

憶昔初入都姝子守金閨問禮喜得師良友如壘簾童  
烏能問字神駿生渥洼忽忽十數年流轉各天涯夔曠

不相遇韶舞爲誰攜鄭音易爲好趨舍惟自知

壬戌之春見茗

柯先生談禮經最樂時董晉卿在  
甥館江安甫已沒彥惟幼稚也

董生平子流制作侔造化探奇赴關隴獨唱定無和莫

言命不諧行藏兩俱可明歲來京華天屬早安妥會當  
排金門清時待名佐

慟絕潘氏子共學能適道悲哉十八齡六藝爲嗜好文  
采斐漢京數術恣蒐討經誼匪賈鄭書文辨古籀斷歲  
痛失恃報劉矢純孝三立希德言寸志豈安飽前苗已  
不秀後籜彫復蚤吾道壞千城大哀惟國寶我夢哭失  
聲怛咤病妻覺

吾鄉大儒宗好古竟忘耄味經善識大

味經外王父齋名

珍菰

益精眇

珍菰從母舅葆琛先生齋名

經心閱雲霧豁若日星皎辭官

爲養志解橐富紉縹廿年正夏時絕學三代表晚歲窮

古籀匡許到秋杪至樂無與談見我廩困倒淫思欲曷

立諫果知味妙從游綬與鳳

綬莊卿珊鳳宋于亭

敏魯各深造

作滿一家竹帛永持保

憶我歌驪駒三老稱兕觥南華貫全史戲謔理愈莊趙

孟善賦詩酒政累十觴淵翁真淵藪觚爵紛琳瑯女樂

羅後庭弦管水中央江山盛文藻園榭列衆芳神仙不

易得

淵翁近校抱朴內篇

彭祖真無疆

太公年近九旬去歲重赴鹿鳴宴

何當解

纓組相與共翱翔

昔作之江游湖山滌塵襟劉阮得仙侶汗漫涉海潯龍

湫天下奇雁峯雲外尋朝發夫容邨軟綠鋪崎嶇曾巒

百盤上萬嶺排碧簪雙剪刺青空側成錦屏風石髮漾

巖際百筵張廣龕山僧代扶筇削劣當解驂常雲終古

潤火燄色黯黯或如僧聽經或如鳳諧琴玉女忽啟牕  
雙將互百尋奇葩燦列宿仙鳥揚清音折華綴飛興蜂  
蝶時相侵應接無淹暑客感何櫻心此中可長年便欲  
投吾簪

我祖純廟初奏賦明光宮裒然冠天下相業善始終伯  
父繼惇敏壯歲躋秩宗我父蓄厚德履滿恒執沖翠華  
蒞南邦特達契聖衷若纘瓊廼緒又見韋平風梗介避  
權貴託迹類阨窮驛華榮一朝松柏能忍冬靜心悟物  
理庭誥齊窮通志欲定家儀祭法明功宗吁嚙世祿誼  
周澤延滕公廟室固不毀收族寧齊同曾孫守經意登  
降習禮容何時成先德保世期亢宗

道南構寢廟因陋宜古今圖書出天府爨器珍南金蔭  
門古桐栢閱世亦已深寢廷植嘉卉高下紛岡岑春秋  
風日佳啜茗發微吟莼菊臨廣軒延客操雅琴荷風動  
疏簾晨馨清妙心傑閣頰城隅瑤箏散幽襟錦鱗啖花  
影綠篠媚碧潯石梁跨通渠迴廊轉華鐙雖無鼎鐘奉  
清顯世所欽作書寄徐淑此樂逾纓簪

李貞女行

并序 以下  
七言古詩

台州府太平縣民李氏女許嫁于林未嫁而夫死女  
奔其喪奉舅姑以終林故貧族女以鍼黹營生節縮  
衣食有餘卽置田產積十餘年有田六十畝因無後  
可立以其田呈請學使每歲按試取弟一人者主之

計所入息分爲四以其三助文生之貧不能應省試者而以其一助武生知縣事某書其事入志乘爲作詩以嘉其志

大田歌古王世遺秉滯穗寡婦伊利先王制禮及敬寡

哀其貧故易厥志

解一

嗟爾李氏女未嫁歿其夫立嗣無

其孤辭親出門去夫歿尙有舅歿夫尙有姑

解二

幸哉翁

與嫗子歿復有子三十年中老景安得此孝哉貞女夜

夜鷄鳴執針黹

解三

倉穀漸以盈風樹何不寧嗟爾貞女

葬祭形伶俜

解四

天年復何羨疏褻復何愛有田貽阿誰

願爲亾夫畢前願

解五

官吏賢且明去住苦不常此粟伯

夷樹頑夫安足當

解六

曰唯聖人養賢曰唯大臣知人間

歲旌節來臨裒然首舉眾所尊

七解

亮哉此邦人治生我

所安思食其粟中夜心忤忤不食其粟貞女心冥冥

八解

天地有時合貞節卓不磨願建貞女閭千秋萬歲日月

龍磨扶

九解

玉山嶺懷清臺義震人主晉所懷銘高行齊

天台

十解

題趙億孫所藏石鼓文次昌黎韻

連句風雨病桑戶擁書斗室猶高歌先生勸我討金石

暫輟秃筆箋董何研尋籀史轉疑竇還入韓室思操戈

宇文舊蒐岐陽下拓跋舊史今不磨從臣綽辨工紀勒

籀篇殘字雄按羅力掃六季追典誥欲與二雅爭嵯峨

三毆軍禮示勿眈昆沱倉止對弗阿盞魚鱗胡御嘉客



盤筴表樹無譴訶宏農橋梁毀霈雨下詔引責義不譌

江陵告昇箸憐愜高詞眇旨追蟲蚪聞聞鳴禽靜梭櫓

獵獵旂旆驚龍鼉公云太史勿旌伐詞人藻筆森林柯

糾蟠神龍燦丹電颯纏天女飛金梭華岑莖蔓怱風雨

圭組黼黻紛委蛇秦碑漢闕久覆滅証以鐘鼎眞義娥

據遺齒缺夾艱窘如滿有小魚之類綺辭樸句分江沱如宮車其寫秀

弓時賦之類未盡除六翰風名駒流汗入郊學唐鄭餘慶始遷

之鳳翔鏤金填廊噴宣和翰藉好古建雙幟歐蘇持議

皆媒科商彝周散並臚削大觀閣殿精英多金仙鉛淚

崑足道何爲荆棘生銅駝天憐箱筆勿淪沒奇氣夜夜

星槎過  
皇翰刻玉頌大學儒官箋詰得切磋嫺嫺

學士癖積古天一閣本揚文波蒙泉先生選經史焚疑  
箸論平無頗剗鐫吡缺椀六統假重虞褚靡知它泰豈  
好名揭肝肺綽曷作僞徒媵嬰懷瓘依違次先覺篆籀  
分析供摩挲鰕生信古守師凜正誥奧義能陰哦有時  
箸手辨金石露易布陳知鸛鵒凌尊頌鼎自樵拓李監  
徐侍慙猗那龍文噩噩愛探索鷄肉矻矻忘輶軻翼偕  
此本書萬遍洗滌俗學回江河燼客鴻丰不可見人壽  
非石无瑳沲

夢董方立

金鶚黯慘碧天泣終南雲海玻璃溼仙人攜手步玉京  
閣道瓏玲出閭闔四圍奇樹千尋立天梯岩光慈恩塔

九重百轉似瓊樓織女雲車手堪接龍文丹鼎噴氤氲  
銀液瑤漿鎮魄竟素蛾二八奏奇舞明瀾回轉花繽紛  
軒皇玉簡世難識蒼沮撓隸親摹勒君于六書九數天文地理之學皆詣極微眇夢中示我手製金版數種枕上猶聞海水聲天鷄唱曉星無色  
題浙江湖南遺卷

之江人文甲天下如山明媚兼嶙峋盎盎春溪比西子  
浣花濯錦裁銀雲神禹開山鑄九鼎罔兩頰伏歸洪鈞  
鋒車昔走十一郡奇祥異瑞羅續紛茲登新堂六十俊

浙卷七百餘獨分得六十卷

就中五丁神力尤輪囷紅霞噴薄作星

火元氣翦鬱輝朝曦肯驚心折且揮淚練時良吉齊肅  
陳經旬不寐探消息那知鍛翮投邊塵文字遼海沙蟲

耳司中司命何歡噴更有無雙國士長沙子孕育漢魏  
眞經神尤精選理礫鮑謝暗中劒氣騰龍鱗侍御披沙  
豁雙眼手持示我客嗟頻湖南玖肆五策冠塲文更  
高妙予決其爲魏君源翽  
然雙鳳冥空碧會見應運翔丹宸萍踪絮影亦偶爾且  
看明日走馬填城闕

游清華閣贈慧上人

以下  
五律

峯泚富山水遠公初結廬洗桐師頗瓚調鶴類林逋靜  
室諸天有談詩一字無京華困人海我亦夢鯁鱸

哭裴春洲同年

論文音在耳噩夢忽驚心玉樹長埋恨金閨痛撫衾遺  
孤未成立羣季半浮沈紀歲方殫仕傷余雪鬢侵

相逢辛酉歲投契各歡然訪舊來江右論詩到性天比  
年同蠖屈况乃送蟬仙世世爲兄弟他生更結緣

東魯講舍三十初度雜述八首

以下  
七律

刷羽飛鴻待順風楮生毛穎識心雄殿前作賦嗤韓愈

時余朝  
考下第

帳底吹笙羨馬融觀稅有人期道合

王文考魯  
靈光殿賦

賦年二十  
觀燕于魯

偕書無主歎途窮近來才氣都消減問舍求

田計未工

索米王門事久虛當牕攬鏡愧髭鬚賦凌滄海堪糊甑

書擬溫城失貫珠

余少喜讀蕃露既冠纂輯胡母子都  
春秋條例春秋禮申何難鄭諸書一

輟于應試再輟于  
遭故尚未畢業

魯國諸生休問字杜陵野老漫譏儒

講舍有  
少陵祠

登壇無佛稱尊處慧日何從燭暗塗

錦字槭開別幾春  
琴聲鬢影感良辰  
金泥岱頂花蟲粉  
珠佩江臯玉手親  
雲裡鳳鳴仙去早  
斗閒星暗象回新  
江郎詞思都忘却  
花片裁來墨未勻

暑氣蘭池入夜無  
倦移桃簟蔭高梧  
窺簾月正藏珠斗  
欹枕冰方滿玉壺  
訪道神山風乍引  
封侯客帳夢真誣  
新來眼纈花凝霧  
怕見金羅雙鷓鴣

擬選樓頭月滿輪  
殘霞新霽記前因  
塵封萬卷娜環地  
鳥散千花錦繡春  
苦恨舟車拋歲月  
羸將杯炙暗酸辛  
懸弧食報今如此  
仲蔚寧終蒿裡人

三聖祠中驗故吾

余兩兄早場先祖母禱于都中三聖祠生時並有夢應

私情未

報愧雛烏遺書尙惜勤燈火

深更讀書祖母輒喚入內祖帳還期拜

帝都

丁未春余方十二歲祖母自家北上猶云望女努  
力讀書都中相聚不遠迨壬戌入都已棄養十四

年

賈傳能文名自達潘郎華髮興先枯寢園酌酒悲風

動家祚休忘獨力扶

眉黛夫容賦子虛文園善病茂陵居捫參擬偕天梯徑  
觀海曾尋地記書濕翠滿庭人小立亂紅窺閣客常疏  
爐香茗椀歸來早寄語誅茅掃敝廬

過雨新林綠意敷大堤人去踏青孤錦囊久熟三生藥

癸亥以前  
詩多散失

玉筍猶藏五福珠閨苑鶯聲春溜滑花房蝶

夢霧糝糊犀香銀液支離甚垂下晶簾讀道書

閏六月三十重度時春秋釋例成題四章示諸生

將母常懷去閏思

義山詩欲去  
閏年留月小

懸弧兩度又相催已秋

願夏心原壯似卷如流日豈遲自此揮戈無善術誰爲  
縮地感生離銀雲櫛櫛瑤宮使青鳥無憑月落時

一月重尋翰墨綠溫城絕業得珠聯

南宋館閣書目謂  
蕃露冕之所垂有

聯貫之象春秋比事屬辭立名或  
取諸此時纂輯春秋條例方竟

窺園未免慚前哲駐

景方知絕幾編

撰此書凡  
三易藁

天造幽人在空谷帝爲詞客

展華年擬將中壽安吾分半世須教萬古傳

弱冠精研志不磨每從家法辨沿訛引鍼難起邛明疾

入室先操武庫戈

此書體例亦  
仿富陽故云

要使日星輝覆益還將

峽石挽積波經神絕業如相待一瓣心香奉董何

姬孔風流尙在茲才疏焉敢抗顏師譚經暫偕扶風帳

識面期窺董子帷金石至今聞擲地靈光何處覓殘碑



當春桃李花如繡三十登壇祇自嗤

寄李四申耆

璇闥椒閣鑲仙班銀浦流雲擁佩環絕代施嬌到金屋  
千重宛委啓名山要將經緯伴元化豈僅文章動帝關  
回首昔年鴈咏地一簾花月夢初還

以先文定公所御狐白裘賜長子承寬詩以記之

晏子狐裘三十年我公四世澤方綿素絲退食中朝望

白簡清風兩袖傳嘉宴已叨宮錦賜故香重染御爐

煙紹衣莫忘司空訓芸館清芬繼昔賢

先文定公乾隆初元丙辰鴻博

伯父少司空公以是年生丙子舉人丙戌探花予告回里時以承寬嘉慶初元丙辰生期以衣鉢云

以先大夫所用圭硯賜次兒承寵詩以勗之

經籙貽子更貽孫手澤猶新感墨痕

賜硯昔因懷

舊德析圭從此沐

皇恩紬書叔重探精奧學易慈

明細討論載誦清芬傳弟子世家江左重吾門

贈費西壩給事使琉球

玉璽龍符剖大荒星臣柔遠下明光中山花鳥通王會

南極風雲護拜章海外雄文龍變化日邊

丹詔鳳

翱翔定知葆節遙臨處島嶠晴飛白簡霜

贈富海颿員外備兵汀漳

鄭公世德炳詞臺三十登壇眾所推此地夙稱工戰鬪

蠻荒宜與凜風裁

帝教禮樂銷兵氣

天遣

東南識異才火烈箴言須記取和平雅量久趨陪

長白安師古貂裘換妾富海颿賀以二律邀予屬和

典衣買醉苦無情銀燭金釵艷此生爲選蛾眉開寶笈  
眞成蟬鬢伴瑤箏霜寒祇覺溫鄉樂官令偏宜畫閣清  
他日安期仙棗會莫將平視誤劉楨

入手明珠豔欲消富平何惜解金貂妃央帳煖春如海  
翡翠衾寒玉放嬌紅袖轉鐙輝楚佩清尊和曲度秦簫  
香篝未燼沈煙細尙有回文護早朝

秋海棠寄洪穉存丈于伊犁

以下  
七絕

斷腸猶自當春看庭院秋深倚畫闌欲向東籬尋伴侶  
晚香依舊耐霜寒

昨夜西風昨夜霜莫教檻外損孤芳自含秋思無人問

一片紅雲墮夕陽

雲作羅衣玉作房  
自憐薄命遜春芳  
明妃環珮無歸日  
莫認殘紅鬪晚粧

華清宮裏影空蒙  
曾倚春陰護淺紅  
便遣清商動愁緒  
幽篴飛入簾聲中

悲秋情緒畫難工  
盡在愁煙泣雨中  
欲倩天風護柔質  
今宵偏是妬花風

欲與芙蓉怨晚開  
橫波曲曲繞池臺  
愁來怕見娉婷影  
願化殘霞映上台

青浦曲水園六詠

分明半幅小吳淞  
飛閣斜連百尺松  
遙語仙人采雲裡

看山何必最高峯

剪松閣

水晶宮裏路回環面倚芙蓉側倚山待得月華生靜夜

春寒獨自啟瑤關

月波軒

月光花影滿衣秋卸得明妝下綺樓蓮子苦心紅徹底

背人還向袖中收

采蓮徑

彈碁玉局意難平遣興何論敗與成燕子銜將花片下

又教殘劫遲清聲

響琴峽

竹弓蒿矢鬪新奇亂舞銀塘陳角移留得綠蘋紅蓼處

驚鷺初定浪平時

射鴨陂

前溪舞鶴映斜暉崑格珊珊倦欲歸乞借俸珠三百斛

養成仙翮化雲飛

飼鶴閣

金縷曲

題看劍引杯  
圖以下詞

颯颯霜風勁閉荆關伯倫中酒長卿多病落拓英雄磨  
盾鼻說甚詩狂草聖正簾外月明如鏡展起生綃剛半  
幅肯稜稜寒意交相映浮大白舉長檠平生知己相  
爲命儘長宵封侯夢杳飲醇休醒昨日軍書渡江去見  
說楚氛未靜正舞徹梁州初定雌鳳雄龍匣中嘯問人  
閒若個堪持贈誰似汝壯心競

蝶戀花

題陳老蓮  
宮景四首

玉軫金徽芳思靜三疊初成時有珍禽聽曲沼芙蓉香  
未盡金風一剪羅裙冷涼月飛來窺鬢影眉黛春山  
消得文園病一片彩雲和夢醒亂螢飄盡無人省

秋水  
琴心

欲染春雲雲近遠拾取飛花招得春魂返褪盡殘紅春

不管輕羅半掩黃金釧弄影橫塘花似面忽憶芳時

無奈春將晚風惹游絲春夢短洗粧嬾對妃央婉浣花

蟬鬢鳳釵開繡幔織女扶筐遙結星君伴窄袖半遮紅

玉釧露珠莫放湘裙浣怡彈驕陽春事晚苦憶蠶饑

不遣雕輪緩據盡柔枝愁未斷明朝更祝濃陰滿陌上桑

欲寄芳心無一字忽見飄紅攬取還疑睇似葉似花春

已逝可堪薄命輕于紙昨夜飛霜凋晚翠繡被春寒

強自扶愁起雁字一行家萬里書成難覓東流水一葉題紅

哨遍趙家菴宅賞菊重次舊韻

落葉滿庭孤館月寒忽到蓬山下記年時幽夢逗窓紗

裊爐烟碧雲低亞。眇瑤堂、霓裳眾僊同話。春陰漫許通  
明。借看柳線藏鶯。珠簾鎖、燕輕紅淺。碧初嫁、怎疏林一  
片。墮明霞、又化作飛瓊落誰家。翠帳垂垂，畫閣深深，夢  
方回也。嗟謝了、春花仙翁。又把秋光賣。君看鳳城上，  
微雲裏。玉鉤斜，便燈炮銀缸。酒空金榼，餐英飲露，真無  
價。况雲錦重回屏山曲。盡紅情綠意，非假。歎南園、胡蝶  
又爭差。料只是霜花暗侵，加迸珠泉石磴，如瀉。休教此  
花瘦損芳思。繞天涯。而今卻憶芙蓉江上，不向東風怨  
者。輕寒簾幙，且休遮却。良宵霧鬢微卸。

又哨遍

丁亥立冬日吳澈翁招諸同人賞菊時予新寓  
與象菴故居鄰回憶戊寅之游忽忽十年重簡

翁



夢破梨雲何處遺愁粉絮慢空下

立冬前兩  
次大雪

記季來情

緒冷冰紗謝紅塵重門低亞訪幽姿瑤臺散僊閒話良  
宵早向金波借喜斗室生春星芒鬪采小紅剛是新嫁  
正姓山挂雪點飛霞又奚似攜尊問山家暈碧流珠刻  
翠裁瓊畫難真也嗟人面桃花花工偷得韶光賣君  
看鳳城外車馬擊路橫斜只詩舫清幽琴閨姝麗環肥  
燕瘦都無價况錦字吟成簪華書就鍾情一劄非假感  
中季哀樂事爭差歎鬢影飛霜亂交加倒琉璃百盞如  
瀉休嫌卷簾風緊吹夢到天涯舞裙歌扇酒鑪禪榻恁  
似此翁悟者天寒月冷片雲遮待兼旬勁妝未卸

先府君行述

府君諱逢祿字申受亦字申甫號思誤居士先世當明洪武初自鳳泗駐防常州是爲西營劉氏自高曾以上詳府君所爲先中書公行狀祖文定公諱綸舉乾隆丙辰博學鴻詞科仕至文淵閣大學士軍機大臣太子太傅入祀賢良祠文定公娶于許有子三人長乾隆戊子舉人廣西南寧府同知諱圖南次乾隆丙戌一甲三名進士官工部左侍郎諱躍雲其季諱召揚字卣于乾隆甲辰 召試第一授內閣中書棄官家居爲文定請建專祠庀祭器置墓田終身不仕卽府君考也娶禮部侍郎莊公存與之女初殤二子禱于都城三聖庵感

異夢而生府君弱不好弄每夜分在家塾非召不入內  
既入而莊太恭人尙口授楚詞古詩雖就枕不輟年十  
一嘗從母歸省時宗伯公予告歸里叩以所業應對如  
響歎曰此外孫必能傳吾學十三歲而十三經及周秦  
古籍皆畢嘗讀漢書董江都傳而慕之乃求得春秋舊  
露益知爲七十子微言大義遂發憤研公羊傳何氏解  
詁不數月盡通其條例年十有八補府學生踰年從舅  
莊先生述祖自濟南乞養歸與語羣經家法大稱善時  
莊先生有意治公羊遂輟業府君復從受夏時等例及  
六書古籀之學盡得其傳學益進莊先生嘗曰吾諸甥  
中若劉甥可師若宋甥可友也嘉慶五年年二十有五

學使錢公賞其文以廩生拔貢時與同邑李申耆先生  
齊名號常州二申年二十有七入都朝考時文定公  
及伯父侍郎公故舊徧京師府君閉戶不往初試一等  
第三復試竟下第始識張先生惠言于都與譚周易三  
禮之學旋省親于山東書院而歸踰年秋聞訃奔喪至  
濟南扶輓歸里貧不克舉葬乙丑年三十歲服闋應聘  
主兗州講席明年歸力營葬事相度經年始得地于邑  
之東北鄉旋構訟不克葬明年丁卯舉順天鄉試編修  
孔先生昭虔故世治公羊春秋者也得府君卷大驚座  
主戴文端公桂文敏公蔣少司農皆國士遇之明春會  
試下第方歸營葬復丁內艱治喪悉應禮經是冬始克

合葬府君以名門之子早負重望屢困場屋又拙謀生  
喪葬之事積載瘁瘡兩浙廣陵連年旅食尙以其脩脯  
之餘葺祖祠嫁季妹心力交竭而學古求道益不衰甲  
戌年三十有九始成進士房師程先生祖洛手錄其經  
策以出總裁則章文簡公周大司空王大宗伯寶少司  
空也 殿試二甲 朝考入選改庶吉士是秋乞假  
南歸在籍二載丁丑散館改禮部主事道光四年補儀  
制司主事在部十有二載凡簿書期會胥史所職者府  
君無以踰人至於據古禮以定今制推經義以決疑難  
若嘉慶二十五年 睿皇帝升遐府君居署數旬

晝夜討論口謄手錄因成庚辰大禮記注長編十二卷

自始事以至奉安

山陵典章備具體例謹嚴其

後承修官書遂全用其彙明年

仁宗升配奉

旨

園丘享位

三昭

三穆餘地

似少

命大學士及禮部詳議府君擬上書大宗伯

旣而失彙止別存禘議藏于家又嘉慶二十二年安徽巡撫咨稱某州民伯仲其一子各爲取婦而仲之婦仍無出將繼其伯之次孫爲仲嗣欲令其服所嗣祖母承重服及母服乃以財予之其當嗣之兄弟皆不可乃請之州府州府以仲爲伯子所別取之婦係中表聯姻難謂妾媵持不能決咨請部示部中欲引慈母如母之律以許之否則或令其子爲仲妻若婦持祖母及叔母之

服府君再立駁稟析義至精同司無以難其案始定若  
集中禮無二適議是也道光四年開通禮館湯少宗伯  
欲派府君纂修旣而不果其後聞館中有改適孫祖在  
爲祖母服期爲服斬一條府君謂先王之禮曷可輕易  
乃復爲駁議以俟後世若集中適孫爲祖母持服議是  
也武進張氏女適胥汪某其姑強使與人通不從毆死  
之使聞于女氏曰于律毆殺謀殺子婦流二千里威逼  
致死杖八十折贖吾夫若子習于吏卽訟必毀而家事  
以不聞府君議曰案康誥父不慈子不祇不于我政人  
得罪天惟與我民彝大泯亂其速由文王作罰刑茲無  
赦言不孝不慈其律均浮于元惡大愆也春秋之例專

殺大夫稱國其有罪無罪以葬別之言有罪且不得專  
殺其罪貶絕也殺世子母弟目君其罪誅也視專殺命  
卿加一等白虎通云父殺其子當誅何言天地所生王  
者所教養父不得而專也禮喪服爲舅姑服期傳謂從  
服蓋婦于舅姑以人合其恩輕于父子今律父殺子之  
罪輕于平人古律父殺子之罪且重于平人況以淫姑  
而戕貞婦乎魯哀姜以淫故殺二嗣子爲齊桓所誅春  
秋譴之宜引以折斯獄後讀律例駁案新編乃知

純廟已有駁例默符經義而俗吏不知遵用爲可慨  
若集中張貞女獄議是也道光四年河南學臣請以湯  
文正公斌從祀聖廟議者以湯公康熙中在 上書房



獲譴乾隆閒曾經奉駁難之府君執筆曰后夔典樂猶有朱均呂望陳書難匡管蔡汪文端善而用之遂奉

俞旨本年七月越南貢使陳請爲其國王母乞人稜

得

旨賞給而

諭中有外夷貢道之語其使臣

欲請改爲外藩部中以

詔書難更易而拒之又恐

失遠人心府君乃爲牒復之曰案周官大司馬職方氏

王畿之外分九服夷服去王國七千里藩服去王國九

千里是藩遠而夷近也又許氏說文謂羌狄蠻貊字皆

從物旁惟夷從大從弓者東方大人之國夷俗仁仁者

壽有東方不死之國故孔子欲居之且乾隆閒奉

上諭申飭四庫館不得改書籍中夷字作彝裔字舜

東夷之人文王西夷之人我朝六合一家盡去漢唐  
以來拘忌嫌疑之陋使者無得以此爲疑遂無辭而退  
其據經決事有先漢董相風類此至多惜平日無紀載  
苦塊餘生又無從訪質掛一漏百哀曷可言今春從少  
宗伯汪公果勇侯楊公徧勘

東陵重相

萬

年吉地咸以府君所呈之平安峪爲上吉據圖入奏楊  
公曰君此事亦能以經斷之乎府君乃爲從容言古者  
葬不及泉引漢文帝灞陵及劉向論昌陵事爲臣子忠  
慮之至楊公歎爲眞讀書人大抵府君于詩書大義及  
六書小學多出于外家莊氏易禮多出于臯文張氏至  
春秋則獨抱遺經自發神悟主山東講舍時爲釋例三

十篇又析其凝滯強其守衛爲箋一卷答難二卷又推原左氏穀梁氏之得失爲申何難鄭四卷又斷諸史刑禮之不中者爲禮議決獄四卷又推其意爲論語述何中庸崇禮論夏時經傳箋漢紀述例各一卷其雜涉蔓衍者尙有緯畧一卷春秋賞罰格二卷凡爲春秋之書十有一種宮保阮公申耆李公各爲梓行于廣東揚州咸謂春秋自唐宋以來郢書燕說國朝經學大昌如嘉定錢氏河間紀氏樓霞郝氏皆號通儒而其說春秋皆襲宋元直錄其事不煩褒貶之說其弊不至于等經朝報束傳高閣不止近日曲阜檢討孔先生潛心大業紹明絕學著爲公羊通義而尙不能信三科九指大義

微言千鈞一髮至若鉤幽起墜干城禦侮張筆削之權  
于三統之內續董胡之薪于二傳之外擇精語詳醇乎  
其醇則自漢以後府君一人而已府君以東漢經師有  
家法可尊者今惟何虞許鄭四君子虞氏之易雖惠張  
創通大義學者尙罕得其門而入因別爲易虞氏變動  
表一卷六爻發揮旁通表一卷卦象陰陽大義一卷易  
言補一卷易象賦卦氣頌一卷撮其旨要約其義例以  
便綴學之士鄭氏于三禮而外于易詩非專門其尙書  
注已亡或掇拾殘闕欲申墨守或旁蒐衆說支離雜博  
皆淺涉藩籬未足窺先王之淵奧乃別爲尙書今古文  
集解三十卷別黑白而定一尊由訓故以推大義冀他

日與各經傳注竝立學官焉許君說文爲形書而古韻  
未有專籍近世顧江段孔推行遞密而收字未有全數  
入聲未審分配乃研極精微分爲二十有六部每部先  
收毛詩字次收說文字次收廣韻字每字復爲推其本  
音詳其訓故又爲條例一卷其名詩聲衍二十有七卷  
集古韻之大成此四端皆府君所學之大者又嘗欲爲  
五經攷異仿陸德明經典釋文之例以存異文古訓先  
成易一卷春秋一卷又取史記天官書及甘石星經爲  
之疏證二卷又有少時所著毛詩譜三卷詩說二卷其  
未成者尙有九章舉隅及小學啟蒙二書無卷數此皆  
府君手著之書其裒輯者則有石渠禮議一卷庚辰大

禮紀注長編十二卷春闡雜錄一卷

東陵勘地

圖說一卷又手摹兩京十六省輿地圖一冊大抵府君之學其異于世儒者有二一曰通大義而不專章句嘗謂毛傳詳詁訓而畧微言虞翻精象變而罕大義求其知類通達微顯闡幽者則公羊傳在先漢則有董仲舒氏後漢則有何劭公氏子夏喪服傳有鄭康成氏而已先漢之學務乎大體故董生所傳非章句訓詁之學後漢條理精密要以何劭公鄭康成氏爲宗然二傳雖皆可以條例求而喪服于五禮特一端春秋則文成數萬其旨數千天道浹人事備以之貫羣經無往不得其原以之斷史可以決天下之事以之持身治世則先王之

道可復也二曰求公是而祛門戶說者謂府君墨守何學然箋中規何五十餘事至于母以子貴及夫人子氏惠公仲子之屬則并舍公羊而從穀梁甚至宋災故一條則并舍三傳而從宋儒劉原父胡安國之說于其不苟爲異益知其同者之非苟同也其說詩書與鄭異義十之四五一洗近世專己守殘之陋又嘗謂漢志有公羊外傳五十餘篇今佚不存左氏正可補其闕惟當復其舊名曰左氏春秋而盡刊去劉歆所私改之經文與所增竄之書法凡例庶幾以春秋還之春秋以左氏還之左氏離之兩美俾攻左者不得摘爲口實人知府君爲公羊之功臣不知其尤爲左氏之忠臣也至于近世

小學但知溯源小篆而古籀幾爲絕學嘗病說文多有  
所從得聲之字反不見于本書而一字重文別體或分  
收各部又部首過繁稽攷不易嘗欲仿爾雅體并其重  
俗補其古訓增其闕文以省初學之心力俾得專心于  
大業手書創橐而未能就也痛哉痛哉府君于詞章由  
六朝以躋兩漢洞悉其源流正變故所著述隨物賦形  
無體不備在他人稱絕業而在府君自視爲緒餘有自  
著詩文集八卷又選定八代文苑四十卷絕妙好詞二  
十卷唐詩選四十卷詞雅四卷藏于家平日師友淵源  
于先正則及見大興朱文正公陽湖孫淵如金壇段若  
膺高郵王懷祖諸先生同志中與其習莊氏學者則有



若莊君綬甲兄弟宋君翔鳳丁君履恒其共習張氏學者則有若張君琦其姪成孫其甥董君士錫其束髮以學行相砥礪者則有李君兆洛惲君敬陸君繼輅周君儀暉李君復來又嘗與劉公鳳誥商五代史于浙江與胡君培翬講儀禮王君萱齡汪君喜孫講尙書徐君松論地理徐君有壬論九數陳君奐論小學于都門于後學接引尤至一技若已有之弟子潘準莊續澍從受公羊禮而潘早天府君痛之于是有反招魂之作同里董君祐誠高才早歿于是有夢董方立之詩丙戌分校禮闈鄰房有浙江湖南二卷經策奧博曰此必仁和龔君自珍邵陽魏君源也亟勸力薦不售于是有傷湖南浙

江二遺卷之詩于諸甥中喜趙振祚于年家子喜道州  
何紹基凡所著述有能獻一字之益者應時改定聞人  
一善則入內時不及解冠先呼不孝等而諄語之喜動  
顏色故平生交游落落聞府君逝而哭失聲者皆道誼  
中人先後長禮部者若高郵王公蕭山湯公樂平汪公  
皆重其學行府君未嘗有所干謁有侮其迂欺其樸者  
府君皆歡然與之卽或代致不平而府君反爲申釋焉  
蓋其肫篤龐厚城府洞然實不知人世之有險巇物情  
之有機械非矯揉以然也嘗爲阮宮保言重雕宋本十  
三經注疏又彙刊本朝說經之書爲皇朝經解  
以幸士林阮公從之遂衣被海內又嘗慕唐柳氏家範

宋范氏義田他日欲仿而行之丙子爲不孝承寬納婦

仿士昏禮行于家廟至于四時之家祭必敬先世之手

澤必珍樂道忘貧之素清苦困窮之節百行難盡俟喘

息稍蘇當謹述其詳別爲逸事以示子孫以府君之古

懿淳悶有先漢申公伏生之風宜享神明之壽以勸儒

林矜後學而甫逾半百遽殞泰山頻年遭死亡之戚遺

篋餘未竟之書此則天道之難問者近載以來府君夜

患不寐不孝等以先慈寢疾方亟又恃府君體素康強

豐頤廣下舉止端重聲中黃鐘必可以冀期頤會不知

蚤勸節勞輔以稊尤迨至先慈棄世府君悵惻益淒又

念失恃之子強爲撫慰本月十二日驟患咯血猶力疾

詣署歸而痰湧氣逆旋止旋作中秋日猶肅衣冠祀五  
祀及先祖四更後喘復大作執不孝等手諭以守祖父  
之遺規法古人之安命至日中遂不起矣嗚呼痛哉府  
君生于乾隆四十一年六月十二日戌時卒于道光九  
年八月十六日未時享年五十有四配潘恭人先府君  
兩月卒詳府君所爲行述子八人存者長承寬嘉慶丙  
子舉人候補咸安宮教習三子承向六子承寔俱監生  
七子承安其歿者次子承龍嘉慶己卯舉人著有麟石  
詩文鈔二卷四子承宴五子承宣均早歿詳府君所爲  
曠記三篇季承宇年十歲殤女二俱先殤長婦黃氏次  
婦謝氏三婦趙氏四婦潘氏長婦三婦俱先歿承寔聘

胡氏孫

開孫申孫俱

承向

出孫女二長

承寬

出次

承向

出又殤孫

受穀承寵

出不孝等

愚陋孤露未足仰測府

君德行學術于萬一惟是府君道誼同志徧海內必有能知之濩道之詳者儻哀而錫之銘誄以慰九原

不孝

等世世子孫感且不朽

不孝孤哀子劉承寬等泣血謹述

賜進士出身

誥授朝議大夫

晉封光祿大夫工部尙書重預鹿鳴宴

欽加四品銜前直隸永定河道山東運河兵備道吏科

掌印給事中掌京畿道監察御史工部製造庫郎

中營繕司員外郎虞衡司主事翰林院庶吉士世

弟王念孫頓首拜填諱

劉禮部集附錄

麟石文鈔

次子承寵遺稿

勃海槐賦

伊昔泰始河流軌沕湯湯  
同同鬻昆崙墟伯禹奠止  
曰灑翼克植物震蘇跼跼  
兮九支分流漫瀾而同趨  
包碣石蕩尾間回波淹溢  
決潏之烝實蒼萃乎茲都  
睢盱迤瀕渙故威漫平遼  
夷坂穹隆鬱律爰有古槐  
劈檣此焉是茁徒觀其枝  
格錯互殷殷莘莘偃蹇緯  
繡龍結烏信沛淖若羽林  
天軍茅絕膠輶而不可干  
也聶虛若變頤疊夙蚺蟻  
霜索而不可拊也繚憲憲  
焉摵赧赧焉纖條雪重美  
髯鬚焉摩來幡幡襜褕焉  
于是虛雄吐雌吟

乾亢坤濇開庫不周之門謫叱諒吸班輪班份厲風踊  
濟上杓下纒狀若朝輦蔓葉連傘布護遠遁平望難澹  
有似壞山入墜亂於如燠被雨披离延坑緣隰歎欲留  
霍還曾逆接哀銓悲嘯前擊後獵十決十蕩清濁互集  
晨風鵠旦嗃嗃相荅嫋婦起嘆逐臣鳴邑魂魄褫散震  
震惴惴若夫箕風動捷日月合朔龍鬬之層雪霜委籜  
脩虬輪囷皓皓皚皚千里而芹夜光晝氣若層巒之滂  
白雲也於是虛燿火通燭游降出偃竅穴矣怒衝標謫  
誰飛燿慘原乍隱乍燿冠冠赫赫電烟魑魍東西馳邁  
煇發雜滅招搖喪精泰豈蒙茂發暫啟臘波流闌闔焚  
摧挾摺堅節礪碎倒注滄海猶不能淬直使人伉焉慨



焉中憤憤焉荆慶之勇嗒然若廢焉若是故天下之至  
奇也亂曰碑碣弗鬱肆蕭肅兮崦嶧崔嵬扶莫莫兮右  
睨鄧林左攬若木兮驅駟元化鎮詠詠兮

學謝希逸月賦

若英沈采金波展輪蘭宮韜暑蕙帳凝塵於時宋武悼  
穠華之輟芬傷椒風之永夜碧樹暖庭金釭掩榭悵間  
館之悶清超紫軟而騰駕迺開廣苑夷崇岡經屬玉披  
林光屬車倍從素琴高張疎星案戶皎月橫塘淒其紈  
扇零亂衣裳濡毫抽簡以命謝莊莊跪而稱曰臣聞泰  
壹剖判陰陽權輿緯以陽曜汁以望舒再索奠位乎元  
冥三五灑魄而盈虛祥風映麗於軒宮少采褻褻於周  
除至其周流霄霓晃朗垓埏戴暈蝕景鋪華剖鮮流蘇  
銜璧散采驚弦慘悽而咏邶詩嘹唳而諷陳篇若夫波  
冷秦關雲平蕤樹蟋蟀秋堂薜蘿春路螢墮梁塵蛛罥

網露蕤玕膏兮夜已闌倚躑躅兮來何莫烈缺霍索扶  
桑翕闕焱流波靡霜委雪積炤散燦爛衝孔漏隙妖蠱  
失鮮鶴子滲白水錯交刀沙沉立戟趙璧睨筵越紉張  
壁於是曳漢宮之霓旌蹠長門之玉舄擘木末之素華  
接雲間之鍛翮洗盞稱觥娛樂今夕若迺寒柝宵征關  
山夜明清砧雜響哀笳競鳴雲暗慘而異色水沈滲而  
無聲雖太陰之潛隔終脈脈而含情願素質之無虧心  
哀鴈而彌貞是時濟陽江湛在側因進而歌曰燎薰爐  
兮坐沉霧吹參差兮愁薄莫酌椒漿兮張綺筵折芳馨  
兮時一顧待得夜光圓紅顏已非故重曰美人薄鬢飛  
雙蛾流盼容與橫文波明月入地星辰多別葉辭風早

惛悵光如何帝廼顧影太息凝神斂魄官以執珪錫以  
連璧敬揖二子延爲上客

七夕賦

蟬蛩邊亭覺夜殘別有悽情憶上蘭刁斗長河爛刀環  
曉月寒汝南鳴鷄哢不息天孫河鼓會應難波深戰短  
霧重釵安排蚪蚪而競渡擁雉鵲而爭看七夕絡緯不  
堪聽薄晚庭葍擁麗人玉條纔壓臂珠碩穩隨身黃塗  
上犀角朱醺入猩脣斜摺香鈿橫抽寶對肩萼全新衫  
痕半故采縷雙懸金鍼並誤蘭芝則斗帳空垂麗玉則  
笙篴微度披香漢殿辟惡魏宮夫容刻縵雲母迴風瓜  
名沈綠桃實浮紅龍子淮南之術鍼神洛浦之工雲幄  
棲魂昭陽轉燭歸風送遠之操落葉哀蟬之曲裙裾舞  
更長紈扇裁逾薄枯碧淚干池灰弔黃姑於鈴索才人

擣素小婦流黃君留朔北妾住河陽秦川迴紋不用織  
蜀郡鳴弦無復張羞看竹葉怯對死央宿鬟掩鬢備簪  
餘粧詎解于闐樂那來蘇合香箇年漢使泛星槎卻帶  
銀河萬里沙豔麗安文石天吳著絳紗沈約新詞何足  
道懷王舊製本堪誇懽懽愁人飄零鍛羽憤鼻恒穿牛  
衣待補冷逐號寒饑隨腐鼠丹砂無長命之期菊水豈  
延齡之主亦復悲章烏夜之詞涕雪涼州之舞吳賢卧  
病鄒陽倦遊長卿不樂平子工愁風蕭蕭而撼戶杼軋  
軋而鳴秋玉鏡滅沒風雲阻修闕山則父子睽隔園柳  
則昆季離憂樹橘柚於淮北植菱荷於道周豈有意乎  
辛蓼復何傷乎鸞鳩謠曰百子池邊嫋柳新珊瑚作枕

未全神蛺蝶穿瓜瓣  
蛩蛩貼領巾還問空  
閨裏紅顏餘幾人

元功垂範錄序

元功垂範錄二卷吏部考功司郎中尹源進撰又續編一卷平原張永格撰蓋敘平南王尚可喜事推本家乘上徵國史援引比附不免褒獎過實然如篇中所載鑒戰廣州則勇足致命矜全佛山則仁能愛人卻鄭成功橫海之師綴李定國鴟張之衆底定東粵帶礪開藩可謂功在社稷者哉漢祖推食許韓信以假王南陽奮績委彭寵以大郡何則勢有重輕則取乎權變時有緩急惟高乎術畧我世祖章皇帝天錫智勇率土

歸心惟神也故能通天下之志惟幾也故能成天下之務平南以熊羆之任爲不貳之臣本非劉項爭衡之時



遠邁漁陽突騎之助時無檣里三至之毀丕著錢俶遷  
坐之誠故勲鏐乎金版義楸乎木冊封侯疏爵澤及偏  
裨佩紫懷黃施及孫子迨夫三桂首禍聞逆效尤將成  
唐室藩鎮之憂猝有七國反書之報然而同功一體能  
消英布之嫌隴底會師光昭寶融之節不吳不敖知天  
知人天王嘉吳芮之忠南粵無尉陀之僭泊乎芒星夜  
竄妖鳥晨飛佳城鬱鬱游魂首邱大樹茫茫疾風掩闕  
百身之贖重錫  
詔言十世之宥以勸能著鄉使  
襲位繼統之子不忘回首面內之思服勞王家世篤忠  
績庶使異姓侯表特美長沙隴西士人無愧李氏之信  
悖惑隳其家聲私造淮南之謀妄受公孫之璽曾不崇

朝而身膏乎礎鎖宮溝乎荆棘躬圭無磐石之固信誓  
少大河之安傷矣猶賴前人之勲 聖朝不廢周勃

支子續絳侯之封張敖尙主食寰內之邑蓋之如天容  
之如地德莫厚焉刑莫威焉是故無其實而喜其名者  
削無德而望其福者約無功而處其祿者辱禍必握賈  
子曰曩令樊鄴曹灌據數十城而王今雖以殘亡可也  
令信越之倫列爲徹侯而居雖至今存可也由此言之  
非三代之法則封建之勢不得行非五等之規則臂指  
之效罕順大都偶國雖以平南餘澤而繼世悖亂難保  
其終易曰負且乘致寇至此之謂也

狼煙臺記

滄州州廨之東偏有古刹焉後爲狼煙臺建司命閣甍  
宇高甍簡浮雲而上馳澆池北流翼蘭泉而中注信左  
輔之勝地勃碣之閑館也白露戒節黃花掩籬廣延朋  
儕偃憩于此旣斃百武時成虬形旋蟲十盤虛作梵響  
繞殿而北莓苔畫塗危牆插穹疑復無路迺有甕闥竄  
然中開天風拂衣納陞聳躋陟級以上魂飛魄釋旣登  
平臺廣約半畝東枕環堦獸角彌望西南俛平臯壓屋  
可數中構傑閣實爲神居羅幢繪雲芬樹凝碧膜拜之  
後朗讀古碣慨叢臺尙新而令尹遺碑姓氏磨滅矣復  
道西東交屬閣後陽祇蔽景從可九筵風聲水聲晃影

駒影波黑皺地沙僵數人憑闌一窺目眩神悸亟命張  
席清譚娛心枯僧煮茗彊作解事時或縱目遠矚則有  
漕渠襟帶蒲帆高張迤邐而南隱約可辨西北有樓高  
正相值辰漢流其牖戶鐘簾架其之而昏星中而作響  
此焉竝處于是日旣西夕愴然忘疲二三名流欲申彼  
雅游罄此極樂流水接軫飛輕動塵揖望僊之高臺弔  
樂游之廢苑洵可以遺世絕俗與物無忤者與昔伯鸞  
窮士登北邙而寓情叔敬高才陟崇岡而貢慨知壽非  
金石當秋而易悲質異松柏經霜而先畏矧夫離羣鍛  
翮聞弦輒驚銜索枯魚逢河便泣者哉良辰不居勝事  
非偶恐衣履一去遂同電謝故次而記之游者某某凡

十五人時道光三年九月九日也

弔亡友臧木齊文

維年月日陽湖劉承寵謹再拜遣蒼頭某以冥鏹若干  
於滄州之西門外循波溯流雜沓焚燒告於亡友臧木  
齋曰九京夢夢天遂同滅蒼天高高爲德不卒生者何  
愛逝者胡害孰令吾子英華彫瘵涕泗盈袍漣洏橫悅  
騁子之考拜經先生研精邃古式玉式金祖周宗漢詁  
訓是正幽讚微言升堂入與披榛廣衢闊宇懸照嘉惠  
後學令德來教 史冊揚光仰止皜皜子勿失怙煢煢  
瞿瞿庭汨孝水案奉遺書人集於苑子捋其荼手澤是  
保克世其家既有令才淹通文史發爲詞章彪炳淵富  
華言朴學一夕可試困敦柔兆余始交君外家舊族通

德之門見君勵志慕君之勤析疑問難式好靡殷著雍  
之秋江水瀾瀾與君同舟秣陵直指清譚劇吟厥味斯  
旨後遂隔閼分裾散星余旣北首君亦南征燕雲漠漠  
粵棹冥冥歲旅重光君舉于鄉振翼 皇路將翔將翔  
與君執手歡喜無量何圖不弔哲人云亡凡我同氣痛  
延中腸嗚呼哀哉哀哀慈母倚徙中闌慘慘養室蹉蹉  
蘭閨翩翩弱息候門長懷朝露奄忽號痛奔摧庭木爲  
實叢雲爲頽嗚呼哀哉聞子歸櫬晨夕戒途值余東遊  
薄辭 皇都執紼禮闕望風長吁昨夜夢子來就余悲  
歡若平生慙慙洩洩彷彿謂我懋勉良圖言將南遷後  
會無期豁然而覺雪涕如絲今也弔子靈兮有知烏虜

哀哉盈盈衛水靈旂是經逾汶達濟斗門揚船石尤停  
焱河伯安程靈兮不昧長卽幽庭烏虜哀哉



神弦以下詩十六首

傳芬葩樹靈鼓巫娥歌浩容與血管蕭灑肥荇宰白荇  
嗽虛堂巫娥坐娛微光神之下挾靈雨帶修虵曳翌羽  
神之至宴瑤房貧無聲啜若英神之起若無所禴哉翻  
震夔舞輯驕心滿庶庶神之喜錫吉羊貽孫子壽命長  
神之來樂無疆神不來蹇遙望神之去露夜湑霓爲車  
風爲御左星妃右龍女神已去斟椒漿衆嫔出爲樂方  
娛金鋪醉八鄉練吉日歡未央

李夫人答歌

昔人有擬作李夫人歌者僕爲反其意作李夫人答  
歌欲實之涕無假繁絃已蛻之蠟終憐落葉子年有

作其采補拾遺之闕乎

虛泠泠兮帷篝火精浮游兮八荒墮反貼瑤璫背君坐

望仙臺歌

并序

漢孝武望仙臺在渤海治相傳漢世入海求蓬萊方丈瀛洲者常祠焉或云海上燕齊間古多夸誕之士因叢臺而託始劉徹意安期羨門之事本幻眇難知而臺固可不論耶後有過者因歌以弔之

茂陵玉盃秋風老照眼羣臺割蓬島漫撫湘娥五色絃神僊賴有詞章好樓船壓浪鯨魚泣夢入神山羽衣濕迴視齊州思悄然祇氛紺紫咸陽涇鉛仙眉淚上壽時金鋪宛轉排雲芝歸來莫向湖陰哭丹竈霏煙鬢絲綠

蠶池

貳師老去龍媒死  
房精夜落蠶池子  
內家妝束桃花紅  
春日凌波浣春水  
寒蠶倚箔了不眠  
浴蠶蠶長絲暗牽  
縑車咿唔曳晴雪  
眉翠奪得文君鮮  
織紈持比顏縑絲  
持比髮願逐薰風  
上綺弦不隨班扇  
搖秋月

神僊曲

金泥夜燒芝房紫  
馬肝誤藥文成死  
崑崙使者綠衣來  
帝遣仙人度龍子  
白鸞白鶴光裴裒  
洪梁醇醪進一杯  
飛瓊鼓簧婉華嘯  
靈音壓倒彌羅臺  
上元夫人胡不來  
莫道劉徹無仙才  
螭蛄狐鳥謾相誚  
玉容一騎紛來催  
斯須簫管碧雲裏  
搖漾華光臉前起  
明姿卻帶鳳文綃

遠遊足躡青絲履殿前再拜環瓏玲憶得霞裙別鳳城  
絳河寂寞五千載迴視玉樓無故釘一卷五岳圖真形  
佩得此訣能長生仙人忽忽向空盡山鬼夜出啼叢林  
擣衣曲

秋光荏苒度銀塘秋月團圞下建章交河戍客多離恨  
代郡才人覺夜長流黃擣素相思夕金風如剪催刀尺  
百丈山頭送斷魂萬重雲裏埋愁魄此時明月忽飛來  
此時明鏡不須開關心下九藏紈扇怕憶上春歌落梅  
鴟雞啼兮看白曉鷦鷯鳴兮衆芳老擬隨清夢逐行雲  
欲寄征衣向晴昊征衣無便寄天涯繡閣曾經五度花  
橫草雄心灰燕頰飛燐碧血汚龍沙玉手開絨重騷屑

廻文壓疊愁明滅君如欲問別來姿一代胭脂一頭雪  
代鰕鮒篇

洞庭揚高颺大澤浮龍蛇鰕鮒處潢汙目昧長江沱竭  
誠奉聖主亮節期無他一朝簞簞議舉足挂網羅聖皇  
心惻慈顧視涕滂沱宥過致薄譴奉詔歸巖阿暉暉曜  
靈馳日夜常經過願垂甦續念濁水肥鱗多

夢遊天竺吟

晝不諷如來經暮不作如是想夸父西行安在哉飄飄  
直挂雙龍杖遠遊不跨空王像我聞雞足山猿猱追騰  
不可非仙人大笑陟其頂顙矚雪嶺相廻環鳳皇上擊  
九千仞不向流沙弄清影今我不樂胡爲乎牀頭且酌

金屠蘇驚峯高高不可見聖水潺湲蕩晴練積雪暗於沙游魂疾于電竭來任我心足躡浮雲行御風列寇等閒耳彷彿踏碎玻璃聲山有林兮雲有陰衝飈動兮扈扈深鳥場藻井三百萬承以一柱盤空春髑髏叢臺愁殺人旱海滅沒猩猩呻生平念想不到此遺憂聊爾忘其真天出地入山魑晝泣晝然陽開雪爾陰合男號女謠川阿次漻白日迸散琉璃塔此中疑是震旦之金焦佛說西方是樂土夢游似醉還如舞世間束縛幾能閑獨酌春風相爾汝去去兮故鄉淹留兮永望何夢魂之惚恍條標倅而飛揚魂邀穀樂招夢向巫陽卜不如我自歌我歌還斷續西風吹得碧雲還脫畧紅塵便停足

漢宮燈火圖

漢王行樂下宜春千騎旌旗拂曉闌夾道香塵迎紫軟  
大堤煙柳簇朱輪昇平暇日多清讌官家暫設西園宴  
碧瓦魚鱗起射熊綠鎗豹尾隨飛燕期門爭選射鵰兒  
才人競插投曉箭此時臨幸太恩恩戲馬臺前走玉驄  
欽飛闕戟腰肢捷慶忌追風撲朔工宮中百戲殊塵俗  
鎮日君王看不足內史輕焙金博山黃門高爇銀盤燭  
麝煤旣炬轉模糊雲母窗櫺翡翠圖小隊金釵排燭婢  
廣筵錦屬引燈奴珠搖斗轉都如意太平結就長春字  
鐵鎖新籠不夜城幻花妙藥維揚製從來鎗火擅維揚  
鳳紙簽題進栢梁拔地浮圖湧晴碧漫天雲海失昏黃

空中漫衍魚龍戲就裏逡巡鳩鵲光妙伎波斯能擲倒  
眩人舍利善迷藏珊瑚碧樹遙相對忽聽雷霆走空碎  
琅璈法曲降層霄偃童歌舞飛瓊佩買春百萬水衡錢  
笑擲璣璣足千載內府傳觴琥珀融大臣進膳豹胎醲  
綬前待詔呼臣朔直省臺郎有藥崧縣官今夕雖遊戲  
悅豫常教萬國同巫雲夢斷梨雲繞知更漏滴銅龍曉  
王母遙傳益地圖詞臣解進通天表昨夜金雞放九重  
諫書不用皂紉封比來三輔逃亡屋盡在君王燭照中  
經西山天下大師墓

荒飈頽雲赤輪墮青鞵布韞卽山暮土人指點白楊西  
云是前朝大師墓大師玉牒譜洪濛皇覺慈悲屬乃翁



暫依石勒鴻圖，拘得勢金陵。虎據雄已定，北平踰洮隴。  
北門筦鑰封龍種，神器須教屬震男。惜哉江左天梁統，  
立賢立嫡正旁皇。流涕青蒲學士章，他日彌留召荀息。  
枉將金匱認齊黃，南朝政府多猶豫。蔣文無意江山助，  
輔臣爭獻智囊謀。噍喑強藩朽索馭，一夕淮南斬中使。  
誅錯爲名新舉事，劉澤瑱邪已見紿。桑門伍被偏多智，  
登壇大將走戎車。趙括空能讀父書，十二金牌生白象。  
八千鐵騎擁黃鬚，鐵鎖沉江天險失。金川避地時倉卒，  
燕子飛來一夜風。吹落江城半邊月，此時魚服混真龍。  
杖策徒傳范蠡從，埋到珠衣人慘慘。那知金盃事夢夢，  
五噫亦有高人隱。十族甘爲故主紅，目連迦葉浮屠客。

旃檀悲惱煩襟釋穆滿曾爲物外遊公孫幾見緱城迹  
星移斗轉物華催阿監青娥骨已灰早時蜀國啼鵲恨  
化作丁令白鶴來淒涼南內無人記捨身同秦莊嚴異  
白馬常翻西竺經黃腸不假東園器野火燒原秋色起  
寢園近在昌平里思陵松楸更堪傷赤帝還遭青犢死  
虞初九百傳聞惑鹵陵石犬何由識望帝難憑真漠靈  
補天願豁妖墓蝕東海桑田幾劫灰長陵歸骨胡爲哉  
十三玉鴿都飛盡銀雁金鳬亦可哀

南苑春獵詞

羲和馭日珊瑚鞭潛蚪海底春無眠一刻一鏤殷紅填  
綠衣倒挂仁虞前羽林騎士何褊褊金支秀采龍蜿蜒

大駕鹵薄南山畋上林園令聞雷駢七萃霧合鸞神弦  
風雲鳥虎屹不旋忽然圻裂氷腹堅天出地入耕瓊煙  
霹靂櫓動校獵傳蚪螭齊足白躡驪夏服勁羽明月淵  
三驅壹發來春田奔戎驍衛植髮髻綠韝錦臂戍削擅  
手扼哮虎足獵獒雉兎麕鹿熊羆豻青青雙柳園東偏  
排雲來下金骨僊跪進神藥長生篇送神西去華陽顛  
羽觴瑤爵玳瑁筵寶刀夜洗清冷淵

雙塔寺古井歌

雙塔入天井出地少師之髮文忠淚倉皇大帝知何之  
白日青天見臣墜臣已墜淚不枯井水澈底孤臣孤神  
旗畫起挾風雨撲倒西山一隻虎

黃鶴樓題壁

拔劒斫山山忽縮放走長江八千斛東龍西龍競喧逐  
噫吁大氣漲坤腹仙人翫世眇一目掉頭終不慣樓宿  
呼童快割縮項鰻道士更煮蒼崖鹿

題綠夢軒樂府

并序

趙厚子以亡室錢季蘋夫人綠夢軒樂府屬題夫幽  
明殊途哀感異致譬之丹鳥之化豈有意乎陳根而  
涼蟬之哀終自憐其落葉漫爲緯繡之語無解牢愁  
之思以報 厚子并題集後云爾

長河輪波海雲白幽脩淚漬銅鋪濕拋得金梭織素絲  
搖搖艷錦浮空碧才人暖閣回春風綺佩錯繡香鞦工

一枝翠管坐拈笑，催放碧桃無數。紅翻飛黃鵠，遠千里。  
木槿花開，暮還死。幾回天上葬金棺。潯水東西亦如此。  
華堂永夜，燒蘭膏流暑。短風刁刁，玻璃拂枕，破昏夢。  
五十瑟弦，渾不牢麒麟夫婿。牽情客，壓疊回文重疊，屑  
熏爐難覓返魂香。羅屏且護潛英石。

西華潭謠偕吳處士

金寬作

隙月飛墮，明霞空斜。日逆照琳光宮。玉如曉夢，撇波冷  
散作千尺紅雲。紅霧重，花寒香不起。石鯨遠隔龍孫水。  
麗殿珠搖萬顆圓。金鮮撲滿。臘脂紫池前。流水聲鄰鄰。  
五花塼背，嬌空春燕，釵拋落水精域。無限蟬衣，浸碧雲  
采芳別館。憐妖嬈綺佩，拂水栽交刀。玫瑰沉醉日，酣宴

蠟淚膩滑蓮房澆晨雞三弄催白曉後房玉樹埋瓊島  
抱月拖雲一縷愁滿絲宛轉荷香老簫管沉沉凝遠鮮  
金支一去如霜煙蓮塘攪碎玉塵夢懊惱死央不作仙  
玉熙宮三十二韻

徙倚青蕪苑神遊萬厯年仙妃九子佩姹女五銖鑲複  
道芙蓉啟香車翡翠填流鶯嬌媚管飛燕貼花鈿稚子  
名如意佳人字小憐銀屏春睡穩金合夜盟堅豔舞霓  
裳曲新翻玉樹篇曼聲中部伎急響大羅天脈望偏多  
巧蛾兒漫欲仙妖書危郭令制挺出張顛俄築溫城第  
遙頌洛邑田疎星依井藻曉夢破池蓮草野憂危息宮  
闈歲月遷潛虬蟠信邱委鬼落當筵鐵鳳迎風設銅身

向日鮮重來紅蓼岸再整綠楊船水調傳吳語雲門拭  
代弦回波詞宛轉過錦箴歸隱不料黃巾熾驚聞赤社  
湮羽書馳秘殿烽火射甘泉血漉豬王酒腥流隸子涎  
藩封魂入醉黼座涕橫漣淡月侵珠網悲風暗錦韉琵琶  
拋曲柄鼗鼓徹旋縣器已金甌闕基難玉局全西川  
渡虓虎北闕葬嬋娟白石迷精衛紅絲哭杜鵑離宮雲  
淡拖寶幄氣沉綿漢臘移朝朝秦灰沒古阡穹標長樂  
燼墜瓦未央鐫此日飛龍牧當時晝雉眠惟留池畔水  
石瀨響潏潏

行役雜詩

曉霧迷人柳微霜拂客刀草埋荒碣短犬吠壞城高

月暗關山夜酸風剪水侵一從天馬去何處問蹄涔  
健騾服輓行敝驪牽犁走南北兩交馳相逢各回首  
後車隨前車遙遙見馬足蹴踏車前塵損我車中玉  
春魂繫不牢隨空任顛倒千尺有情絲若箇儂懷抱  
刀房玳瑁飾淬以鸛鵒膏剗削及蔥薤何物能堅牢  
明星

明星厯厯照南浦天上仙人不能語玉釵墮地冷無聲  
却下簾櫳放鸚鵡

賦得三十未有二十餘

病中作

昌谷通飢客飄零感劒書年華嗟若此人壽竟何如宿  
擬明星貫湖剗積雨餘春風芳訊度夜月影弦虛與尙



黃門待才真處士儲成丁全恍惚周甲半消除大運憑  
流駛新詩付短驢鶴齡誠可借奴僕命三閭

賦得茂陵秋雨病相如

病中作

窮年消渴病天意困相如蕭瑟三秋雨栖遲一畝居當  
墟攜昔酒封岳著新書瘦骨鶻裘擁名心狗監除愁霖  
茅屋下隙地寢園餘采筆猶能在文琴祇自儲遺編中  
使乞哀誅細君據卧枕芸香足誰憐蝶夢余

舊時梁苑客今日茂陵居病骨西風裏秋齋夜雨餘地  
名園令稱天氣惱公初口吃呻憐爾眉尖鎖看渠怯寒  
身已慣消渴症非虛玉盃他年夢金泥此夜書醫須攜  
屐訪鬼教畫符除更憶君平卜時晴再叩廬